

**thaum ub tsis pub leejtwg paub, thiab kom Yexus ua tej haujlwm ntawd tiav raws li Vajtswv twb xub npaj tseg lawm.**

Txoj haujlwm uas Vajtswv yuav ua kom tiav ntawd, yog txoj uas Vajtswv yuav coj ib puas tsav yam uas Vajtswv tsim los lawm, tsis hais tej uas nyob saum nruabntug, thiab tej uas nyob hauv ntiajteb no, los nyob ua ke rau Yexus Khetos ua tus thawj kav. Thaum txog lub sijhawm uas Vajtswv teem cia lawm, Vajtswv yuav ua li ntawd. (Efexaus 1:1-10)

**Yog li ntawd nimno nej cov uas yog lwm haivneeg, nej tsis yog lwm haivneeg lawm, thiab tsis yog cov neeg tuaj ua qhua nyob. Nej muaj cai ib yam nkaus li Vajtswv haivneeg thiab nej yog Vajtswv tsevneeg.**

Vajtswv muab nej los ua rau saum tej ncej uas cov tubtxib thiab cov xibhwb cev Vajtswv lus muab txhos cia lawm, Yexus Khetos yog tus ncejtas.

**Yexus yog tus txheem lub tsev ntawd khov, thiab yog tus ua lub tsev ntawd tiav log, ua lub Tuamtsev pub ua Vajtswv tug.**

Vajtswv tabtom muab nej cov thiab lawv cov txhua tus uas nrog Yexus Khetos koom ib txogsia los ua lub tsev rau Vajtswv tus Ntsujplig nyob (Efexaus 2:19-22)

## 379

### **TUS UAS YUG DUA TSHIAB**

Muaj ib tug txivneej npe hu ua Nikaudemaus uas yog cov neeg Yudais ib tug thawj, nws yog Falixais pab.

**Nws tuaj xyuas Yexus hmo ntuj, nws hais rau Yexus hais tias, "Xibhwb, peb paub hais tias, koj yog ib tug xibhwb uas Vajtswv txib los hauv ntiajteb no. Tsis muaj leejtwg yuav ua tau tej txujci tseemceeb uas koj ua, tsuas yog Vajtswv pub hwjchim rau tus twg tus ntawd thiaj ua tau xwb.**

Yexus teb hais tias, kuv qhia tseeb rau koj hais tias, tus uas tsis tau yug dua tshiab, tus ntawd yeej yuav tsis tau ua Vajtswv haivneeg ib zaug li.

**Nikaudemaus nug Yexus hais tias, tus neeg laus lawm yuav ua li cas yug dua tshiab, nws yeej rov mus tsis tau hauv niam plab thiab yug los ib zaug li?**

Yexus teb hais tias, kuv qhia tseeb rau koj hais tias, tus uas tsis yog dej thiab Vajtswv tus Ntsujplig yug, tus ntawd yeej yuav tsis tau ua Vajtswv haivneeg ib zaug li. Tus uas yog neeg yug, tus ntawd yeej yog neeg, tus uas yog Vajtswv tus Ntsujplig yug tus ntawd yeej yog ntsujplig. Koj tsis txhob poob siab rau tej lus uas kuv qhia rau koj hais tias, txhua tus yuav tsum yug dua tshiab.